

摘藻堂四庫全書薈要

集部

欽定四庫全書養要卷一萬四千一百六

集部

騎省集卷十一

宋 徐鉉 撰

碑銘三首

舒州周將軍廟碑銘

將軍諱瑜字公瑾廬江舒人也吳史列傳功炳乎丹青
皖城遺祠頌闕乎金石嗚呼皇天有造物之柄有愛民
之仁必待聖人而後行王者有承天之德有濟世之量
必待聖人而後發故天人合應聖賢相須民之司命闕

一不可雖復凌雲之構非一木之材千金之裘非一狐

之腋然其建大號運長策總覽英傑弘濟艱難亦一二

人而已故草夏者九有之師而伊尹為阿衡翦商者三

千同德而呂尚為尚父秦為無道高祖誅之則鄴侯蓋

於羣后莽據閏位光武正之則仲華冠於四七漢宗失

御孫氏奮發破虜討逆繼志勤王而將軍傾蓋於千載

之期濡足於百六之會策名江左宣力中朝殊勲盛烈

曠代齊契何其偉哉於時王業始基羣兇方熾國難薦

及人心屢搖將軍情發於中義形於色履艱危之際貞
節彌堅率震蕩之衆伸威方厲推誠以明大義故逆折
游說之鋒屈身以表至公故首定君臣之敬摧赤壁之
陣勢動九州建漢中之謀量包四海於是強敵攝迹羣
生延頸姦雄之智無所施為漢室之隆未可量也嗚呼
天未悔禍國之不幸修塗止於偏帥大命殞於巴丘流
慟於當時遺恨於終古豈四百之運厯數難移三分之
基疆宇有限不然何雄才大畧神授之如彼短命促齡

天奪之若此忽乎茫昧不可得而詳也夫英聲由於茂
寔元功出於全德威稜所及非勉強之攸能績用斯存
豈毀譽之可奪有吳為新造之國柴桑乃觀望之師大
帝非爭衡之才子布有私室之顧將軍投袂而起橫戈
以出魏蜀二主天下英雄或垂翅而宵奔或俛首而求
救降茲以往烏足道哉至於分財推宅之仁觀樂審音
之妙知人先覺之哲存交服物之懷寔天縱其能亦行
有餘力矣嗟夫民墜塗炭真主所以矍瘡天造草昧良

佐所以驅馳非君臣同體不足以濟大業非帷幄共斷
不足以制衆流將軍能沮幼生之譚而吳主亦能拒敵
國之間將軍能畫不世之策而吳主亦能破羣疑之心
故得不顯霸功若斯之盛當此時也如趙士之碌碌漢
相之齷齪徒使有若林之會安能施一繩之維又况於
市道之交署門之客哉此義夫節士所以感激於風雲
惆悵於時運者也嗚呼微管之績既樹於中區盛德之
祀遂崇於東夏歷世逾遠善慶彌彰翼子謀孫徙封移

社而支庶繁衍故在舒庸召樹猶存魯堂無壞光靈不
泯寔生太尉中書令西平恭烈王焉半千之運懸符祖
德萬夫之望允濟時屯始為定亂之雄終為佐命之老
而仁風所被多在故鄉王與嗣子鄴皆節制廬江今仲
子祚復刺舉潯部過里門而載軾瞻廟貌而長懷命梓
人以新其堂與督里宰以除其徑術教祝史以絮其遵
豆率宗屬以薦其孝思肇建豐碑以永前烈懿哉象賢
之美共理之勤民用綏和歲則大有戾夫不佞敢作頌

云

皇天上帝敷祐下民既命賢主亦生賢臣有若將軍救
時之屯仗義秉信資忠輔仁堂堂定策寥寥忘身雄飛
夏口橫薦江陵將軍猶生漢室不傾將軍既没天下三
分盛德之享嚴祠未陞壯夫擊節義士沾巾猗歟舊國
赫矣雲孫嗣勲纂服長戟高門壽宮有煥靈貌如存我
紆蘭佩來挹犧樽懷賢慷慨用獻斯文

大唐故匡時啟運功臣清淮軍節度壽州觀察

處置等使特進檢校太傅持節都督壽州諸
軍事壽州刺史御史大夫上柱國彭城威侯
贈太尉劉公神道碑

聞夫郊圻內理牧萬民者是曰諸侯境土外攘守四方
者其惟猛士然則安危異任文武殊塗故天下方爭韓
彭英吳橫雕戈而震耀羣生待理龔黃寇賈擁皂蓋以
從容及夫昭格宸區紛綸簡冊其歸一也代有人焉若
乃總是全謀覃於奕葉流光受社潛齊累將之家崇德

計功下視慙卿之族古難具美我則兼之公諱崇俊字
德修其先彭城人高祖升調補山陽淮陰尉遂家焉即
為縣人也岳峻洪基海䟽遥派陽城相土千齡侯伯之
封沛澤中興兩代帝王之肩懷黃結紫論鼎甲以盱衡
刻像圖形誓山河而捧袂國史家牒披卷可知頃者聖
運中微羣方暫擾驪山之北犬戎興戲水之師踐土之庭
天子屈河陽之召公路擁南陽之衆僭號仲家隗囂據
隴右之圖坐論西伯勤王問罪吳太祖始定揚州賜朕

專征昭皇帝遂加殊禮於是揚旌北討遷寇迹於淮濱
闢土西封謀守臣於諸將命我顯祖作牧鍾離乃固堡
障之嚴載施犬馬之備軍無牝政將期十萬之行師有
見糧即聚九年之蓄方圖大舉已伏前戍永年不登未
幾而歿長山羣盜舊畏來公西域故營願從班勇復命
烈考嗣膺使符不還渭水之兵誓卒龍門之托故蓼城
之戰斬獲過當汝陰之圍策勲居最先零委質闔充國
以無由獫狁驚魂射郅都而不中疇庸錫羨建清淮軍

以壯中權加禮慎終贈太尉公以光幽窆既而鼓輦悽
愴部曲徘徊家有遺恩人思世德帝曰崇俊惟爾恭儉
孝友誠明惠和任則中軍帥位則文昌長誕舉攸職予
惟汝嘉濠梁之郊控扼遐裔惟乃祖金克懋厥始乃考
仁規克慎厥中肆予命爾克成厥終往哉汝諧無廢朕
命公銜卹奉詔墨經即戎鋪陳政經討閱軍實思有以
光大前緒播揚國風初二先公之理也屬洛邑再遷後
郊作梗偽新竊據延仍十五之期黃武開元始創三分

之業犬牙之地蠆尾常搖鋒鏑縱橫車徒奔走摧牙獸
困尚遙匡復之謨賴尾魚勞未暇綏懷之術逮公之理
也寇皆遠遁民佇息肩千里風從四方聳聽以為格物
必在於立制也故藝貢賦以息貪暴之端暢刑章以拯
姦宄之極賞不虛授罰其必行以為富邦必在於務本
也故使民以時相地之利持未熟之稻游惰自遷班再
易之田兼并絕倖以為邊寧不可以忘武備也故遠斥
堠浚溝隍竹與木而靡遺膏與苦而畢給亭障兀峙軍

聲隱然以為強兵必在於實皇畿也故招懷邊氓講習
戎事游兵冀馬俱為無犯之容晉勁齊雄並集選和之
下歲揀精銳歸之京師其餘庶政常經門見戶睹斯可
畧而言也高皇帝禮均元老寵冠列藩受禪之初則進
上公之秩肆類之際則委廉使之權言必見從無再却
之奏君常高枕忘北顧之憂皇上欽奉重熙聿遵無改
毘倚尤重親敬如初先太尉公之薨也西北小驚戒嚴
從便因詔執事移清淮軍於壽春及是復立定遠軍即

命公為節度使仍以公少子匡符尚永嘉公主留侯操
印初躋上將之壇帝子吹簫即降王姬之館禮優伯舅
望重懿親於時公蒞濠梁十有七年矣米鹽皆序丞史
當才閉閣罕訟舉烽無驚朝廷以公能光前烈雅得邊
情清淮之師遺風仍在俾盛一家之美載嚴萬里之城
改壽州刺史充清淮軍節度使鄧侯倏去鷄鳴傷父老之
心長者復來虎渡息鄉閭之患能事畢舉考功再期方
將建大旆以風驅指函關而電掃雲中鷄犬八公之迹

徒存夢裡膏肓二豎之妖遂作春秋四十保大四年夏

六月十有六日薨於壽春公署皇上剪鬚靡及穿壁方
遙投綠沈之瓜悲哀竟日賜黃腸之器慷慨霑襟廢朝
三日中使護塋詔兵部侍郎李貽業持節冊贈太尉賜
謚曰威即以其年秋九月十五日備鹵簿鼓吹塋於濠
州鍾離縣大化里之原禮也前夫人李氏後夫人隴西
郡君李氏皆太師趙忠懿王女也賴鄉仙李即開柱史
之源參野飛龍遂紀宗卿之籍勲庸六鎮時高謝氏之

門師範兩朝室有班姬之訓荃薜蘭蕙映戚里以芬芳
藻荇蘋蘩播婦儀而昭晰門內之理夫人有馬子八
人二子幼長子節早亡次範滁州刺史次簡次策次霸
時未仕次符祕書郎或得公之政事或得公之兵鈴學
禮學詩惟忠惟孝皆推酥酪之味咸有芝蘭之芳所謂
積善餘慶世濟其美者也惟公山河龍鳳凝粹彩於神
姿綿候風雲集淵謀於靈府議公家之事不以身為行
將軍之令每由剛克卒祖禰之成業可謂聿修膺牧伯

之寵章訖無虛授所以始終匪玷福祿攸歸同族之間
朱輪結軌季父仁瞻作鎮夏口弟崇佑崇僖更典晉陵
其餘將軍列侯中卽校尉銀黃照爛光浮道德之門珩
珮陸離響雜高陽之里苟非自天攸相與國無疆其孰
能與於此乎向使享大年數遠畧鴻飛鵬舉功未可量
也天命不然能無永悼昔者荊州從事猶牽墮淚之悲
大宰舊寮亦有懷鉉之請况乎世功丕顯揭日月以高
驤帝念惟隆會雲龍而下濟欲垂萬葉可不務乎微臣

職典絲綸詞非清潤持赤管以承詔拂貞珉以投刀庶
使蚩蚩萌隸觀迹而長懷眇眇來雲披文而盡信其銘
曰

惟彼陶唐有此冀方自天祐之後嗣其昌侯遷魯縣帝
隱芒碭猗那大族嵩華配長風颯彭城興我遐祚顯顯
山陽著我高祖高祖伊何仁而不遇慶鍾令孫聿來用
武皇運中否諸侯起爭浚郊怙亂淮孺不庭吳王奮發
受鉞專征命我顯祖守濠之城濠城嚴峻濠兵驍勇顯

祖帥之羣兇振恐將軍下世邊烽亦聳乃命象賢荷時
之寵荷寵伊何載大其功蠢蠢梁寇言言潁墉是馘是
俘兵無頓鋒爰有奇畧集於威公威公嗣侯不墜其訓
戎事之隙民功是振為之中典著之令聞泗上風移京
師河潤帝曰伯舅予嘉乃勲扞境則武安邦則文乃降
王姬於爾慶門乃改乘輅於彼西軍西軍何在鎮彼衡
霍威公來思式遏寇虐邊馬已遠將星俄落百身寧贖
九原誰作明明天子惻愴聞聲歲云秋止返旆遲遲二

藩士女泣涕漣而賢侯逝矣吾誰與歸黯黯塗山湯湯
淮涘駟馬悲鳴滕公所閉甘棠勿翦召伯攸憩是用刊
碑永告來裔

唐故德勝軍節度使檢校太保同中書門下平
章事扶風馬匡公神道碑銘

夫道被萬物處其中者是曰賢人功濟橫流讓其先者
方稱君子施之則開物成務興廣業而同歸卷之則保
族宜家垂令名於必大是以長沙吳芮繁祉邁於三雄

南陽賈復貢寵隆於四七歷代已降靡不由之迄於我朝則扶風公其人矣公諱仁裕字德寬其先扶風人子孫或從官於徐方今為彭城人也粵若萬邦作乂益有佐禹之功因封受氏奢有却秦之績公侯必復關西靡孟起之威文武未墜南郡被季長之德存乎譜牒無侯闡揚曾祖某祖某皆以鹵莽之氣當屯蒙之運不履王侯之事歸全父母之邦考某少負雄名為武寧軍裨將才高位下厥用弗昭累贈尚書右僕射傳曰有明德而

不顯當代後必有興者故其餘慶集於我公惟公克稟粹靈夙彰奇應方娠而神貺協夢既生而異氣充庭宗族相驚閭里交慶識者謂之曰不意英物復鍾此兒天將啟之馬氏為不朽矣長而爽邁輔以博聞善無常師器以虛受乃皇圖中否赤縣淪災戰國縱橫爭求策士孔門堂奧半作家臣公負先見之明審擇君之義舉旗沛澤即授中涓定難京城仍叅主簿而上方從歷試允懋臣功經綸草昧諮訪遺闕公親侍左右日奉謨猷能

知四國之為且掌賓客之禮勞無伐善夙夜不離於公
美則歸君論議莫窺其際出入二紀懋肩一心車服以
庸寵祿來假乃升朝序乃掌禁師以佐領軍將兼總丞
相之兵衛申令惟一任衆惟睦推以恩信先之勤勞周
廬既嚴軍士以簡考績稱最帝用嘉之遷檢校司徒遙
兼宿州刺史夫千騎之長可以圖功百城之權可以觀
政中外迭處抑惟舊章即授楚州刺史本州團練使旬
服之際邦賦是繁長淮之衝戎寄為急公奉揚王畧遵

舉詔條人不易方計日而治徵為右衛大將軍復領舊
兵以衛相府董齊之畧有踰於初明年改右金吾大將
軍以扶風縣三百戶為封邑執金之職歷代雄重綿祀
虛位公首居之內訓攸飛之士外察苛留之禁熊羆宣
力輦轂無塵及上允膺內禪光啟建業寺府軍衛半存
舊京委公留臺右帥俾率東夏即遷檢校太保改右天
威副統軍進爵為伯陝服從入公有力焉及參告類之
儀益光求舊之舉寵開幕府遙領徐方進封郡侯定食

千戶左輔之地王業所基藩屏京師惟公攸賴乃移使
節往鎮京口公慈惠著於郡國威德洽於士心由是齊
人向風暮年報政加同中書門下平章事廬州節度觀
察等使自南北分隔戎華交馳合肥之郊常制衝要故
有台階之命以增外閫之威公於是謹斥堠審號令習
組練之士則聲如飀馳嚴堡障之備則勢若山立寇不
敢犯邊是以寧而察俗之方如南徐之理方當矢謨帷
宸薄伐闕河渡江之誓既陳沂渭之舟已具嗚呼良圖

未展早命不融春秋六十有三昇元六年閏三月五日
薨於廬州公署上省奏震悼廢朝三日即用玄甲之數
式擬鐵山之功給於官司臨以中使奉常以視履考祥
之義循貞心大度之美詳協公論易名曰匡即以其年
四月七日備鹵簿儀衛塋於廬州合肥縣鄉里禮也公
娶同郡萊氏封彭城郡君麗穠李之華親采蘋蘩之職理
內協鵲巢之詠從貴有魚軒之華某年月日先公而逝
嗣子右弓箭庫使光庭東頭供奉官光祚閤門承旨光

紹皆稟義方無忝遺烈家承膏粱之後而恭順克修職
參紈綺之間而雅素自若君子謂扶風公其有後乎夫碑
頌之設有自來矣琬琰之細既垂於茗華盤盂之微又
參於警戒若乃道合天眷忠存王家累輔翼之功而鍾
鼎之報罔間享將相之賞而帶礪之誓弗渝時無間言
沒有餘惠故其宗廟之紀金石之盟昭示來茲不可誣
也小臣不學奉旨刊文庶使計功稱德代遠而愈信披
文相質事久而彌芬峴首之懷靡盡昆吾之烈長存鳴

呼哀哉其銘曰

益作朕虞寔曰元凱崇基締業明德攸在維趙於蕃封
移族改祚寔刊山源長巨海因枝別代覓渭來遷道德
絳帳勤王跼鳶流光襲祉映後昭前懷黃結紫著簡成
編誕發材英肇惟明懿鼎角膺奇龜文履異博容汎愛
入孝出悌運有屯蒙器無凝滯爰初發迹雲從潛泉濯
纓職幟拊翼中涓良驥處服忘歸在絃樞機言行無競
維賢繾綣從君匪伊履屐勤毖前及周旋陞戟居國必

聞在身無擇帝爰允諧昨乃丕績惟彼淮泗疆以獯夷
維此京浙統以邦畿封淮表浙惟惠惟威椒蘭在俗轅
轍興思羣舒待理獫狁孔棘帝謂侯氏纘服新息式固
爾猷惠此廬國乃陟台階俾藩於北龍旆四牡鉤膺鏤
錫命服有煒光聲載揚獷敵弭耳蚩毗嚮方上儀象物
下謚飛章梁木或顛通川有逝長城既嚴哲人永瘁像
著雲臺風存遐裔輟春盡思瞻山隕淚信結殊俗悲深
上旻丹碑既刻列鼎盡勲祁連不泯庸器長存丕顯百

代惟子有臣

騎省集卷十一

謹案卷九第二頁前五行侯樹屏翰原本脫翰字
今增

卷十第二頁前八行然後式間表墓歸馬放牛原
本式訛軾問訛廬放訛牧今並改

第五頁後七行觀之者亂臣知懼按此句上下有
脫文

第八頁前二行璋郎之符原本郎訛底據周禮改
第十三頁後八行峻殄堅夷原本堅訛豎據晉書

改

第十四頁後三行方介十巫原本巫訛五據山海

經改

第十九頁後七行造橫橋於通津原本橫橋訛橋

橫今改

卷十一第五頁後八行射郢都而不中原本郢訛

郢據漢書改


第八頁後七行緯候風雲原本緯訛經今改

第十頁前四行五行京師河潤原本京訛高潤訛
澗並據後漢書改

第十一頁前六行無俟闡揚原本闡訛闡今改

第十三頁前八行沂渭之舟已具原本沂訛斤據

宋書改



總校官庶吉士臣張能照

校對官學正臣李巖

謄錄舉人臣李元位

欽定四庫全書薈要

集部

騎省集卷十二至
十四

詳校官助教臣常循



欽定四庫全書薈要卷一萬四千一百七

集部

騎省集卷十二

宋 徐鉉 撰

碑銘五首

苑山紫陽觀碑銘

臣聞

太初之氣其生也無始衆妙之門其本也無名積

而成形散而為器乾坤運之而兩儀位王侯受之而天下貞是故斷鼇鍊石之功絕地通天之業衣裳軒冕之后干戈揖讓之君雖復遭罹異途步驟一致莫不契協

於神明之域飲和於道德之源廣無為之為執無象之
象萬物恃生而不有百姓日用而不知其迹也則格天
光表先人而成俗其本也則收視返聽全真而養身至
其玉檢登封蘿圖啟後游神象外脫屣區中鑄金鼎而
來白雲登寒門而立玄極闕宮清廟式嚴觀德之場玉
洞金壇別啟下都之所由是靈符總集真籙歧分三元
八會之文潛通髣髴七映九華之室密擬形容足以徵
福應于含生致孝思于時事聖人繼作雲來相望故節

山紫陽觀者今上敬為烈祖孝高帝元敬皇后之所重

修也爾乃星紀儲精昭為峻極河圖著錄懸示禎期自
道氣融明真科流行治化宏開于赤縣符圖廣祕于名
山而華陽洞天寔羣仙之都會金陵地肺又三茅之福
鄉左憑柳汧烟霞輻映右帶陽谷川源隱鱗伏龍靡迪
鎮以雷平之嶺鬱岡迴合浸以護軍之潭郭真人叩舷
之池不遷留岸許長史煉丹之井自冽寒泉白露紫烟
照映其上飈輪鶴馭往來其間高真七人四處茲地其後

貞白先生以玄德應世肇開朱陽之館以玉書演秘爰
立昭真之臺堂靖䟽基玄州之蹤可擬生徒廣業白龜
之跡斯存金紱鳳羅代相傳授龍車虎駕世有飛升及
玄靖先生以冲氣含和體庚桑之歲計玄宗皇帝以尊
師重道屈軒后之淳風由是天眷遐臨皇心密契惟新
舊館再易華題丹鼎洞經潔修無倦芝泥龍簡投奉相
望戶邑之民豈止奉明之縣樵蘇之禁寧惟柳下之墳
故得雲物告祥芝英表瑞小周王之瑤水徒詠空歌異

漢帝之猗蘭唯陳甲帳自茲厥後代有修崇上士名人
時時解脫雲輶羽蓋往往降靈皆著於金石播於謠頌
嗟乎四時代謝天道盈虛雖九氣長存歷劫以資其融
結而三階有象隨時因表其晦明則斯觀也將世運以
汙隆與皇圖而升降赤明未啟猶多閭戶之悲白水方
興始漸高門之慶孝皇帝猶龍孕德指樹垂陰應樞電
之殊祥有天中之奇表甘盤就學和光於百六之初庖
正分官利見於九三之際賓門納揆有大造於當時形

矢旅弓允至公於四海由是法堯受命祀夏中興補西
北之不周應東南之王氣御明堂而揖羣后輯瑞玉而
覲諸侯既治定而功成更憂深而慮遠乘奔馭朽不以
黃屋為尊旰食宵衣惟以蒼生為念知無為之無敗體
上德之不德凝神姑射端拱穆清政舉其中事至而應
愛民重法敦本訓農偃革消兵守好戰必危之誠卑宮
菲食懼以人從欲之譏故得百寶効靈三辰薦祉遠無
不屆邇無不安少康光武之功獨高帝錄貞觀開元之

業更啟孫謀今上承績德之基法自然之道變化無方
之謂聖神武不殺之謂仁學洞精微守謙光而冲應用昭
隱伏體大度以包荒動則庇民不矜功而尚智靜惟修
政恒務嗇而勸公聞善若驚每賞秋毫之細容光必照
寧遺行常之微化洽風隨時和俗厚嘗以天下者烈祖
之天下憲章者昇元之憲章垂裕無窮永懷罔極衣冠
原廟未足盡思聲樂娛神良非至敬緬慕在天之駕因
嚴訪道之宮尋屬長樂上仙躍龍興感載詠生民之頌

思弘十亂之宮乃眷靈巖誕敷明詔發虞衡之吏集般倭
之功執藝駿奔飭材廩至果園之柰供其礬斲北邙之土
給其圻塹乃新祕殿祕殿孔碩黜其霑霽屹其穹窿璇題
互照以晶熒珠網交疎而窈窕震殷雷於滴瀝拖宛虹於
楸軒忽陰閉而陽開乍霞駭而雲蔚儼若虛皇之御穆然太
上之容疑馭氣以迴隣眇凌雲而遐觀乃立高門高門有闕
擬金闕之觚稜洞朱扉而煥照龍章鳳策以之題署霓旌
絳節茲焉出入乃建兩序紛逶迤而重濶乃起層樓邈宮

亭而顯敞北彌郭阡之路南亘姜邑之衢赫光影以燭坤
麗丹青而薄野遠如神運恍若化工每至日薄星迴歲之
云莫桐華萍合春聿載陽赤城旋軫之初白鶴會朝之際
都人士女舉袂成帷襲靈風而各洽天和仰卿雲而方知
帝力豈止百年猶畏獨識軒轅之臺三壽作朋永閱姜嫄
之廟大哉至矣無得稱焉夫妙本太無名垂不朽挺窮神
知化之盛然後顯通幽洞靈之微立尊道貴德之教然後
致還淳反朴之理漸於人為富壽被於樂為聲詩告於太

史為典冊著於豐碑為銘篆既光丕顯其在茲乎爰命
下臣敬書全德其詞曰

邈矣至道悠哉妙門黽黽無物綿綿若存是生清濁爰
闢乾坤乃生之民乃作之君德盛惟皇功高曰帝訪道
峒山求珠赤水古或知臨時稱至理三正循環鴻圖資
始於惟基命赫矣皇唐運啟再造天垂百祥玄德升聞
既壽永昌時乘白雲至於帝鄉穆穆嗣君雄雄下武禮
極配天教明尊祖明發盡思儼然若覩敬佇仙遊式嚴

靈宇靈宇何在句金之陵丹霞夕映白霧朝凝重屋四
注崇臺九層雲生窈窕日麗觚稜三秀交陰五便分徑
丹砂流液玄洲立靖柳谷絢烟雷池寫鏡彷彿九華依
稀七映至誠則感有應斯來含真上客蕭閒逸才飈輪
倏忽晨蓋徘徊浮黎認土方丈凝臺昔在聖人建言敷
教救物以慈奉身以孝敬佩真契恭聞大道顯妙用於
言象鼓淳風於億兆薦純嘏於無窮仰皇猷之克紹

池州重建紫極宮碑銘

域中之大曰道百行之先曰孝故孝心克乎內必道氣
應乎外於是有聿修之德追遠之懷揚名顯親之善集
靈徼福之舉用於邦國則臣節著施於家庭則子道光
以之為政則民從之以之薦信則神降福然則壇館之
作焉得已乎池州紫極宮者本東晉之普明觀也浸之
以秋浦鎮之以齊山北望陵陽竇真人飛升之所南瞻
九子費徵君棲隱之鄉玄風徘徊精氣交感代有奇士
居為殊庭既奉玄元之御因崇紫極之號治亂迭運隆

替不常戊午歲太守陳公始臨此郡歷境垣而嘆息步
遺丘而顧瞻役不徒興義將有屬公媯水洪派太丘舊
族重世避地徙居建安祖德門風冠映圖牒王師拓境
閩方即叙撫納歸附旌訪賢能惟我嚴君首奮竒節芟
夷逋穢弘濟艱難偏師所指無往弗克在十年之間由
裨將歷郡守登上公建齋壇功名之盛近古無匹及王
室多故邊城不寧復遣公督舟師率諸將萬里赴機三年
轉戰筭無遺策兵不頓鋒威行軍中勲在王府舍爵再

命聿來是邦於是解甲釋兵頒條布政事從中興民用
接和會文賦詩彬彬然有儒者之風矣俄而王妣國太
夫人凶問至公孺慕出次烝烝永懷以為柔儀慈訓實
大吾族鞠育仁愛兼倍諸孫嘗藥弗親執紼且違欲報
之恩王事靡盬思所以薦祉於冥漠求神於希夷非龜
山之宮必易遷之館然則琳房金闕瑤壇檜井迎列真
之御資閭風之游仙經不誣勝事可作於是瞻星揆日
飭用庀徒散廡下之金出荆門之絹人百其力工薦其

能易其傾頽化以壯麗成於心匠不愆素期自某年月
鳩工至某年月訖事凡出錢若干萬築室若干間正殿
當陽三尊負宸享列宿之位於東序設三官之堂於西
廂嚴饋奠之室於艮維所以盡時思之禮敞開宴之庭
於乾位所以極坐忘之懷矢棘雉飛霞馭雲蔚璇題行
月煥城邑之晶光飛甍白日壯江山之氣色如是則飈
歛之駕不得不臨肝鬢之福不得不集想見武夷之會
足申令伯之心至矣哉善慶孫謀無得稱已嘗試論之

曰神仙者君子之所歸也故真誥云至孝至貞之人皆
先受靈職次為列仙歲登降其幽明如人間之考績矣
若乃盡忠於君純孝於親敦惠於民歸誠於仙而不得
與夫餌芝朮醮星斗者同躋真階吾不信也勗哉夫子
其惟有終鉉扈駕南巡致禮名岳假道過此仰瞻久之
博我以文輒不遜讓其銘曰

我經池陽池陽既康化以至道民知嚮方乃新開館以
奉虛皇君子薦祉則惟其臧我登新宮新宮既崇濔嚴

耿耿丹彩彤彤九華散影十絕盤空若在宣岳如遊閬
風至道不煩玄關甚邇孝享誠敬奉時祀妣善慶純嘏
施於孫子三茅二許夫何讓已流芳金石永永千祀

唐故道門威儀玄博太師貞素先生王君之碑
原夫至道之先邈哉稀矣書契已降可得而云黃帝堯
舜澄其源故垂衣恭已在宥天下伯陽仲尼導其用故
建言立德憲章無窮赤松羨門神而明之故輕舉上賓
留侯商皓變而通之故解景滅迹順是以下莫不由之

故有搢紳端委利萬物於廟堂之上葛巾蕙帶全陰功
於塵埃之外隱顯殊致趨舍同歸其人有終其魄不死
閬風玄圃羣帝之密都赤城華陽仙聖之治所光靈肝
鬯若在左右仁人君子往往至焉見之於貞素先生王
君矣君諱棲霞字玄隱華宗繼世積德所鍾生於齊得
泱泱之風長於魯習恂恂之教七歲神童及第十五博
涉經史闕黨童子靡敢並行東方諸侯為之前席而仙
林靈氣亨於自然塵纓世網不可拘係每名山獨往神

契感通奇怪恍惚衆莫能測天祐丁卯歲避亂南渡至
於壽春感四海之分崩想八公之遺跡於是解巾名路
委質玄門問政先生聶君師道見而奇之授以法錄是
日彩雲皓鶴翔舞久之既而窮方士之遐遊得東鄉之
勝境道無不在善豈常師又從威儀鄧君起遐受大洞
真法玄科聖旨動以諮詢福地仙源因而棲托誅茅穿
徑枕石漱流身既退而名愈彰道已寂而節彌苦桑田
自改桂樹長留烈祖漢高皇帝方在賓門寔來作鎮紫

氣表真人之應青雲符好道之占君鵠書被徵褐衣來
見談天人之際講道德之源靡勞牧馬之迷自契順風
之問因從敦請來止建康有玄貞觀者陳宣帝為臧矜
先生之所作也殿堂岑寂水木清華遊焉息焉以遂其
好竹宮望拜玉牒祕詞叩寂求貞必君是賴嘉祥靈應
世莫得聞聖歷中興恩禮殊重加金印紫綬號玄博大
師烈祖常從容謂君曰吾不貪四海之富唯以蒼生為
念君對曰夫古之聖人修其身而後及天下天下待一

人安而後安今天子勤勞萬機忘寢與食身且不能自治豈能治蒼生哉帝善其言以百金為之壽其識度亮直又如此焉今上嗣清淨之基尊玄默之化諮諏賓敬有踰於前而君茅嶺夙心老而彌篤比年抗表請歸舊山優詔惜之又加貞素先生之號既而玉棺有命紫素告期葛洪見留不成大藥少君捨去先夢繡衣保大壬子歲夏四月甲寅隱化於玄貞觀春秋六十有二恩旨痛惜賻錢二十萬道俗嗟慕會葬數百人初君之處茅

山也即良常洞之前相當平山之下披榛剪穢面壑臨
流除地為壇表朝真之位因丘設隧卜安神之室至是
歸塋符夙願焉六月發自京師泝淮而上時畿內久旱
川塗可揭是日大雨洪注騰波却流驀長隄踰重堰飄
然利涉人不知勞昔周王有樂水之朝宣尼有四川之
應校靈比德其殆庶乎君傳法度人數踰累百有若玄
貞觀主朱懷名先入室道極嚴師首座孫仲之章表大
德劉德光恭受經

闕

願垂不朽

之風威儀王可

闕

刊貞石鉉也不

佞夙承教

闕

途而誠心所感素交斯

在徘徊

闕

首之悲以俟遼城之歎詞曰

於鑠子晉上賓於天亦有令孫窮神體玄昔我來思世
稱其賢今我往矣人謂之仙至道希夷孰知其然華陽
洞府句曲風烟林芳橘葉地即芝田披文相質億萬斯
年

袁州宜春縣重造紫微觀碑文

若夫聖人有作沒而不朽畏其神而向其臺思其治而
愛其樹故尊道貴德立化所以無窮高山景行後賢所
以不乏宗門光啟上士勤行書契已還煥乎丹青者可數
邦域之內表厥宅里者相望時運與并人境交得教之
大者其可忽乎袁州宜春縣紫微觀者蓋有晉鄧表真
人上升之地也左鍾山之奇峰右洪陽之仙洞巉巖千
仞蔽虧日月窈窕百里畜涵風雨迴岡層巒崇其基坳
激湍澄谿宣其氣象真靈之所游集邑居之所走望皇

統中否下國尋戈齊臺祕宅多廢且壞鹿巾霞帔藐矣
流離藻局黼帳翦焉墮廢而周德未厭漢中仍存舊物
既甄墜典咸復惟茲靈境將俟其人道士孫去華殖本
康樂之川從師新吳之邑清心鍊氣絕粒忘形三十餘
年其道彌固保大中自所居華林山館南游北鄉望佳
氣之鬱葱躡危垣之靡迤慨然歎息誓志終完於是面
壑依巖披榛築室勤身而感物應迹以化人鄉閭風隨
詭信日至節以致用時而命工二十餘年厥功克就紺

殿特立重廊回闕合朱戶以瞰野峙瑤壇而在庭至於
像設之尊嚴仗衛之精麗厨廩之充牣居室之清閒洪
纖必周奢儉中度美矣顯績昭哉素誠夫褒善稱伐春
秋之旨雖在遐遠人其捨諸監察御史李君思義奉使
宜春稅駕斯館都厥成事嘉其秉心碑而揭之以文求
我言意難盡強為之銘銘曰

袁君之賢此州乃名鄧氏之仙此觀乃形春華麗絕真
氣融明允矣與壤居然福庭運逢交喪地有遺靈美哉

孫師興廢扶頌重閣金鑰還飛火鈴烟霞聚散颺歛逢
迎精誠所感大道方行用刊樂石永告雲扃

舒州新建文宣王廟碑序

鉉嘗讀文中子所著書竊觀其建言設教憲章周孔有
道無位故德澤不被於生民然而門人弟子如房魏李
杜輩皆遭遇真主佐佑大化元功盛烈亦云至矣猶以
為禮樂不興未能行文中子之道嗟乎使顏閔之徒遇
貞觀之世舉聖人之業成天下之務豈不益大乎時運

不並亨聖賢不世出可為長嘆息已矣夫太羹玄酒足以通神明而不能競適口之味大咸雲門足以和風俗而不能高娛耳之聲五常六德足以興國家而不能勝捷給之數釋菜合樂足以祈永貞而不能掩福田之說李斯荀卿弟子也而為焚書之酷德彛文皇上宰也而沮王道之議況其餘哉故用兵已來郊庠鄉塾委而不修者有年矣皇唐中興之一紀天子乃崇學校養庶老舉六德教胄子旁達郡國靡然向風舒州古諸侯之封

也其地廣其任重太傅周公舊勲碩望來頒詔條武以
貞師仁以行政動必資於前訓舉必順於人心前吏部
郎鍾君頌登銓管之司是叅侍從之列論思典治必以
名教為先洎從左官來為佐職神交主諾人無間然始
一年而旱暵作二年而百穀登三年而上下和既富而
教爰脩廢典乃嚴社稷則播殖之功報乃祀箕畢則風
雨之候時乃即黌堂謁先聖寢廟卑而將祀衮冕陋而
不度政之大者烏得已焉於是庀功庸示儀制堂奧戶

牖魏乎大壯山龍藻火煥乎有章重門以深之周垣以
繚之俎豆升乎筵千戚由乎序僉僉衆賢是配是侑肅
肅燕毛以衍以樂閭伍之屬耆幼之倫惠澤漸乎肌膚
風教移乎情性惜其所治者百城耳推是而往何所不
至哉鉉也不才放逐至此蒙地主之惠接故人之懽博
我以文宜無所讓屬役既具冠篇將畢會鍾君召還京
師祖行之夕視草以送且曰敬教勸學非大君子不能
行計功稱伐非大手筆不能任吾友紫微郎韓君即其

人也託之銘頌以永清風

騎省集卷十二

欽定四庫全書薈要卷一萬四千一百八

集部

騎省集卷十三

宋 徐鉉 撰

記七首

宣州涇縣文宣王廟記

昔夫子祖述堯舜憲章文武扶東周於已絕拯蒼生於
既墜其迹屈而道愈大其人亡而教愈遠則生民已來
未之有也其在祀典法施於人則祀之矧褒聖之祀其
可忽乎然則中人不足以語上下士聞道而大笑故斯

教也衰於戰國廢於嬴政漢魏以降續而復絕夫仲尼
日月重昏千祀非聖人孰能廓之故斯教也興於武德
盛於貞觀極於開元理自然也兵興以來大化墮替先
王禮器委頓於勝廣之門闕里諸生恟惶於絳灌之下
矧厥祠宇其存幾何天之愛人不當遂絕皇統再造六
藝始修太歲丙午重熙在運宣城雄鎮帝之叔父在焉
故幕府之選殊重尚書郎吳君光輔奉詔佐廉部兼理
於涇既蒞事乃被儒服謁先師闕荆棘歷堦垣以造於

茅茨之間仰瞻俯觀喟然而嘆於是奉開元之成制采

類宮之舊章經之營之是卜是築惟新拓殿儼飭辟容

入室升堂森然如在邇豆有位賓主由序表著咸列門

衛肅然於是青衿儒服之子有從師觀藝之場兒齒給

背之徒識養老慈幼之節欣欣然其化之大者歟明年

秋君奏計如京師因得其實嗚呼聖人在上羣才畢舉

復使三代之風達於邑里不其偉哉余承君之歡美君

之志刊石紀事實於祠庭後之君子無忘企及其餘理

畝籍察庶獄闢汙萊遏陂塘則有考功之吏在故不書
於時太歲丁未冬十月九日尚書主客員外郎知制誥
徐鉉記

復三茅禁山記

華陽洞天金陵福地羣仙之所都會景福之所興作故
其壇館之盛薦享之殷修奉之嚴樵牧之禁冠於天下
其所由來舊矣聖厯中微官失其守望拜之地多所荒
蕪若乃真靈翔集玄貺肝蠶興復之迹必假異人天祐

丁丑歲貞素先生王君棲霞始來此山蒼佩上法徘徊
地肺偃息朱陽永懷舊規期在必復先生潛德內映符
彩外融名士通人道契冥會凡縞紵之贈飯信之資悉
奉山門以成夙志於是由良常洞至雷平山十里而近
於入萌隸者盡構贖之芻蕘不得輒至墟墓不得雜
處執樹蔽野植松為門川梁必適榛穢必翦建方壇於
雷平之上造高亭於良常之前朝修有致誠之地游居
有稅駕之所姜邑古陌秦望舊封肅然清光復如開元

天寶之歲矣先是紫陽之右有靈寶院焉真臺故基鞠
為茂草先生殫罄資用克構殿堂有開必先無遠弗
屆都督武陵康王奉錢百萬梁王造殿一區向道之徒
咸助厥事曾未周歲惟新舊宮皆先生之力也昔大隗
致襄城之駕庚桑化畏壘之人是知道心惟微其應如
響時則有若道士金若虛協規同志是攝是贊幹事以
恪感物以誠績用不愆斯寔攸賴先生以保大壬子歲
夏四月悉書人物之數疆畔所經請命於京師申禁於

邵縣以授茅山都監鄧君機一能事既畢數日而化期
命玄應昧者不知夫仙階感召諒非一揆若乃神清氣
靈骨錄標映受之於天也心虛氣冲玄德克蔚基之於
性也昭真垂教啟煥靈跡行之於勤也故策名紫素飛
步黃庭流功儲慶必參相合然則先生之道其殆庶乎
雖徽駕不留冥升日遠而高風可述遺範在人進而紀
之翰墨之職也鄧君全墓前躅見託直書己未歲秋八
月日記

宣州開元觀重建中三門記

夫清淨玄默道之基也宮館壇墀道之階也生知者因基以成構勤行者升階而覩奧故君子德業玄挺仁慈積中必廣別致之方乃形兼愛之迹為科誡以檢其情性為象設以致其誠明情性平則和氣來誠明通則靈符集由是登真正之境入希夷之域曠焉無際薰然大和斯寔興化致理之方還淳反朴之本豈與夫延方士尚秘祝求長生以自奉者同年而語哉宣州開元觀遠

擬清虛獨標形勝敬亭崇峻鎮其後句谿澄澈經其陽
鍾一方淳粹之精結三素氤氲之氣當泰陵之尊道揭
聖厯於華題藹爾殊庭居為福地及運躔百六數偶三
災雖棟宇不踰而制度多闕靈蹤必復有待而興主上
嗣位之七年皇室再造之一紀今儲后徇臧札之操讓
德承卑體間平之賢總戎藩服首台司而握師律鎮京
口而領宣城其為政也質以先正諮於耆老義以果斷
仁以發生民力不偷闕政咸舉而斯觀路門久廢遺址

將蕪非所以敬教尊祖會昌建福者也乃命執事即從
經度民多暇日府有羨財勤而不勞成而勿亟巨棟山
立層簷翼舒六扉洞開方軌並入重廊助其迴合祕殿
表其深嚴十絕之幡拂文楣而絢彩九龍之驂軋金鋪
而振響瞻之者有凌雲之氣經之者疑駕歟之游信足
以勵上士之進修福蒼生於仁壽既而功宣納麓望集
撫軍大壯之制斯成重離之位亦正貞符允塞盛德宜
書道士孫洞虛素業淳深至誠敦慤發揚真迹啟迪嘉

猷永為不朽之功願紀它山之石宮臣執筆以謹歲時
戊午秋九月庚申記

紫極宮新建司命真君殿記

夫金闕琳房不可階而升也惟至誠能通之靈符景福
不可企而望也惟至行能致之故君子行道於時宣力
於國敷惠於民貽範於家此人之極致自天所祐也又
况考集靈之地崇列真之宇薦納約之信勵勤行之誠然
則希夷眇邈超言象之表矣有若故司空相國馮翊懿

公承世功之緒襲重侯之業地親於副馬美繼於緇衣便
蕃臺閣出入夷險中立不倚金石貫其心唯力是視風霜
盡其節故四綜會府再踐中樞三殿方鎮一平邦土慎
終如始沒有遺忠激楚之樂雖窮通德之門不改嗣子
太僕少卿俊等祇奉慈訓弗敢失墜以為公之純誠冲
氣本道家者流而仁政令典近浹於三茅之境高齋甲
第夙鄰乎玄元之宮故棲神植福必先於是爾其治城
峻址西州舊署卞忠貞之遺隴郭景純之故臺九原可

作勝氣如在乃相形勢補廢闕建司命真君之殿於宮
之艮維披真蘊以立程集國工而考藝瞻星揆日不勞
而成崇高壯麗重深藻繪煥如也凝旒端簡負斧仍几
穆如也珠旒絳節紛披乎左右歌洞章蕭寥乎晨暮
真聖以之而臨御純嘏以之而蕃錫賢人有後孝子奉
先無以加於此矣鉉始以事分通舊從子弟之游終以
禁掖具員陪僚屬之末及公之啟手足也復忝國士之
許辱寄託之任知己之厚何日而忘短扁叙事蓋感遇

之萬一也

楞嚴院新作經堂記

君子才足以治劇惠足以安民見危致命以死勤事有一於此然後可以薦信於無方之神儲慶於必大之門噫楞嚴院經堂之作也其庶幾乎平陽柴君諱進思字昌美故太尉中書令尋陽靖王之孫也少而爽俊長而忠愍尤善騎射頗曉兵書靖王愛之出則典親兵居則專家政幹蠱之美宗族稱之王薨始為公臣累遷旅帥

鴻圖再造金革復威上以其才能可任故以為內院副
使乘輅建節將命四方盤根錯節所至皆治改鄂岳觀
察巡官知永興縣事縣有山澤之征權管之利歲終考
績倍於前人遷泰州軍事判官兼營田鹽監平蠹政決
庶獄勞農督課潔己律人民不告疲公有餘利除勸農
使復監池吉二郡護武昌軍千里晏安上流靜謐會梁
人入寇我武未揚東畿陷沒羣情震駭命君為行營應
援軍使率舟師數千鼓行而東平淮濟口復海陵郡於

是淮泗之地聲勢始通垂勝長驅因迫隋苑前茅接戰
羣帥後期振臂奮身有死無二雖破竹之勢敗於垂成
而東道清夷本由君之一舉也江都克復歸葬京師天
子憫焉贈左千牛衛將軍賻贈加等禮也嗣子殿前承
旨廷遇等棘心在疚荼蓼兼倍以為苴麻苫由飭哀之
期有終蒸嘗封樹追遠之禮有數復欲圖不朽之績徼
無邊之福則金仙之教世之所崇宗旨在於經文成容
存乎像設於是擇奇勝之地補闕遺之事構經堂六間

塑地藏菩薩像一軀几席竹器之類華而備精而固沈
然其質煥乎其章潑嚴足以遠世喧虛明足以味玄旨
其全節之風也如彼其集靈之所也如此然則冥冥之
祐綿綿之慶豈誣也哉余頃歲左官海陵君盡傾蓋之
分感忠臣之事主嘉孝子之奉親刻石紀事以聳善也
援筆悽愴無心於文保大丁巳歲春三月日東海徐鉉
記

攝山棲霞寺新路記

棲霞寺山水勝絕景象瓌奇明徵君故宅在焉江令公
舊碑詳矣高宗大帝刊聖藻於貞石紆宸翰於璿題煥
乎天光被此幽谷先是茲山之距都也五十里而遙方
軌並驅崇朝可至及中原構亂多壘在郊野無牧馬
之童岐有亡羊之僕義祖武皇帝潛龍茲邑訪道來游
始命有司是作新路金椎既隱玉馱言還峒山之駕不
追回中之道亦廢於戲聖人遺跡必將不泯微禹之嘆
夫何逮哉保大辛亥歲時安歲豐政簡民暇粵有寺僧

道嚴名高白足動思利人百姓莊思悰家擅素封積而
能散嗟亭候之不復憫行旅之多艱乃相與翦荆榛疏
坎窞闢通衢之夷直棄邪徑之迂迴建高亭於道周跨
重橋於山上鑿甘井以救渴立名表以指迷草樹風烟
依依四望峯巒臺榭肅肅前瞻由是江乘之塗復識王
畿之制矣余職事多暇屢游此山喜直道之攸遵嘉二
叟之不懈為文刻石用紀成功俾後之好事者以時開
通隨壞完葺此碣有泐斯文未湮不亦美乎其年八月

一日兵部員外郎知制誥徐鉉記

常州義興縣重建長橋記

聖人作川梁以濟不通舟車所及纚連綦布若乃形勝
傑大名聞天下者亦無幾何陽羨長橋其一也夫英賢
之所躔次邑居之所瞻望山川之精粹宅焉里城之神
靈憑焉廢而興之圯而葺之豈惟備政足以徼福是橋
也徵諸圖牒則後漢邑令袁君創造國朝永泰中令丘
君新之其他無聞焉中興之初邑有義夫曰吳濠吳須

率以私帑備加營務人賴其利踰三十載丙辰歲國步
中梗百越寇邊邑人敗之燒營而遁飛焰旁及宏梁半
摧甲寅歲著作佐郎劉君來為邑長視其制度知非民
力之所能濟乃狀其事白於有司上聞嘉之詔賜錢八
十萬君信而好古寬而得衆尉廬舊鼎甲餘慶俊造策
名政是以和事無不舉乃相與敷王澤因民心備物致
用程工揆日器利工善材良事時戊辰歲冬而裁明年
暮春而畢長五十步廣七步對縣樓而直出跨荆谿而

橫絕丹雘其飾倏偃蹇而虹舒崇高其勢邈宕亭而山立
朱輪方軌駟馬連騎營營市井憧憧往來有衽席之安
無揭厲之患昔者乘車濟涉聖人謂之無政橋梁弗修
賢相知其不能以今方古勝負分矣夫書云考績傳載
稱伐庸庸善善其可廢乎刻之貞珉以示來者庚午歲
春二月十五日記

騎省集卷十三

欽定四庫全書薈要卷一萬四千一百九

集部

騎省集卷十四

宋 徐鉉 撰

記三首

頌一首并序

贊四首

銘二首

哀冊文二首

重修徐孺亭記

至矣哉天之愛民甚矣雖數有治亂而常生聖賢故得其位則功加於時舛其運則教垂於後雖銷聲滅迹全身遠害不德而德普逃名而名揚擁篲築宮禮重於列

國式閭表墓道光於無窮舉善而教政之大者也恭惟
我祖炳靈南國舊宅界乎仙館高臺峙乎澄陂孺亭之
稱海內瞻仰名公良牧代加崇飭千載之下猶旦莫焉
頃屬邦君非才敗我王度翦焉層構鞠為茂草噫百世
之祀誰能廢之庚申歲始建王都辛酉歲遂遷清蹕肆
觀羣后疇咨先賢餘基未傾偉人將至既而鼎湖在御
桐圭錫壤丞相司空鄧王以茂親之重膺分陝之權思
老成之典型仰高山之景行同言而信不肅而嚴乃命

經營將從締構九成方起百堵未周甲子歲入秉國鈞
以武昌運帥侍中濟南公代司宮鑰公致用以武從政
以文祇奉蕭規率由周禮再賡成制詳考舊基夷坎窞
而就平裨崖岸而增固乃崇堂奧乃加藻績右嚴罇坵
之序左設庖膳之區前臨康莊旁眺城闕平湖千畝凝
碧於其下西山萬疊倒影於其中依然懸榻之場想見
致芻之狀與夫洪崖之館絢綵於烟霞滕王之閣騫飛
於雉堞南州之物象脩矣前哲之况靈萃焉嗟乎君子

興一役建一事於時必可頌於後必可觀茲亭之作也
都人朋悅過賓矚目紀於方國之吏播於樂職之詩鉉
也幸承燕翼之謀獲參翰墨之任俾垂不朽敢憚蕪音

喬公亭記

同安城北有雙溪禪院焉皖水經其南盛唐出其左前
瞻城邑則萬井纚連却眺平陸則三峯積翠朱橋偃蹇
倒景於清流巨木輪囷交陰於別島其地豐潤故植之
者茂遂其氣清粹故宅之者英秀聞諸耆耄喬公之舊

居也雖年世屢遷而風流不泯故有方外之士爰構
經行之室回廊重宇耽若深巖水瀕最勝猶鞠茂草甲
寅歲前吏部郎中鍾君某字某左官茲郡來游此谿顧
瞻徘徊有懷創造審曲面勢經之營之院主僧自新聿
應善言允符夙契即日而裁逾月而畢不奢不陋既幽
既閑馮軒俯盼盡濠梁之樂開牖長矚忘漢陰之機川
原之景象咸歸卉木之光華一變每冠蓋萃止壺觴畢
陳吟嘯發其和琴瑟助其適郡人瞻望飄若神仙署曰

喬公之亭志古也噫士君子達則兼濟天下窮則獨善其身未若進退以道小大必理行有餘力與人同樂之為懿也是郡也有汝南周公以為守有潁川鍾君以為佐故人多暇豫歲比順成旁郡行再雩之禮而我盛選勝之會鄰境興閭戶之嘆而我賦考室之詩播之絃頌其無愧乎余向自禁掖再從放逐故人胥會山水窮游良辰美景賞心樂事有一於此宜其識之立石刊文以示來者於時歲次乙卯保大十三年三月日東海徐鉉

記

毘陵郡公南原亭館記

人生而靜性之適也若乃廟堂之貴軒冕之盛君子所以勞心濟物屈已存教功成事遂復歸於靜用能周旋於道常久而不已者也有唐再造俗厚政和人多暇豫物亦茂遂名園勝槩隱隣相望至於東田之館西周之墅婁湖張侯之宅東山謝公之游青谿賦詩之曲白楊飲酒之路風流人物高視昔賢京城坤隅爰其別館百

畝之地芳華一新舊相毘陵公習靜之所也其地却倚峻嶺俯瞰長江北彌臨滄之觀南撫新林之戍足以窮幽極覽忘形放懷於是建高望之亭肆游目之觀睨飛鳥於雲外認歸帆於天末四山隱現而屏列重城邐迤而霞舒紛徒步而右回闢精廬於中嶺倚層崖而築室就積石以為階土事不文木工不斲虛牖夕映密戶冬燠素屏塵尾斐几藜牀談玄之侶此焉游息設射堂於其左湛方塘於其下虛楹顯敞清風爽氣襲其間碕岸

縈迴紅藥翠行藻其渌至於芳草嘉禾修竹茂林紛敷
翳蔚不可殫記凡廐庫之室廚廩之區賓燕所須不戒
而具每良辰美景欣然命駕羣從子弟結駟相追角巾
藜杖優游笑詠觀之者不知其為公相也古人有言朝
廷之士入而不能出况於輕鍾鼎之貴徇山林之心將
相之權不能累其真肺腑之親不能係其遜道風素範
豈不美歟又以鉉無事事之情有善善之志見徵拙筆
用勒貞珉是時歲次辛酉冬月十日記

劍池頌并序

歲次辛酉月躔仲冬王人徐鉉揚旌銅柱之鄉稅駕劍池之廟嘒嘆靈迹徘徊故墟或曰龍泉太阿安得為寶出也不為當世之用佩之不免亡身之災天下固有虛名而無寔效者歟愚以為不然夫聖人之於天下亦物耳所稟受者異故能與造物者並而為天下王是以聖人之作也天不愛其道地不愛其寶同聲相應同氣相求人謀鬼謀皆為聖人用無功無迹豈尋常所能識乎

然則集陰陽之英萃山澤之精窮爐冶之妙極鋒鏖之
利宜其冥合玄造弼成聖功者也昔黃帝法月滿而鑄
鏡用能炤燭怪魅辟除不祥大禹收貢金以鑄鼎使民
知神姦以遠不若漢高祖佩斬蛇之劍以撥亂除害奄
有天下是以三者皆人力所為也咸能輔佐興運與時
隱見其可誣乎在昔三分叔世咸有昏德天命將改寰
宇將同斯劍知之故靈發於下氣浮於上應帝王之符
命矚識者之觀瞻亦猶伊尹負鼎於莘墟仲尼動色於

魯相千載一會聖賢所以汲汲也向使晉武能誕若天
意克明峻德判忠邪之路絀驕侈之心則賢能盡其才
神靈効其用淳耀之烈可續七百之期不喪而王猷既
鬱亂本既成百姓失望羣龍沮色於是斯劍也委質張
雷之鑑一泄其憤遠迹劉石之醜復歸於潛其出也所
以示神之不亡其去也所以示德唯是輔則其為用也
遠矣昔者周過其數秦不及期是知天命之精微可以
人事而延促前哲論之備矣若夫精真之誠修於內感

召之致應乎外自然而然有道存焉不可以智求不可
以言達王者得之則三五之功其餘事耳然則天下至
寶本非人臣所服變化無方神物之事也忘身殉國忠
臣之節也兩造其極求仁得仁復何怨乎廟在豐城故
縣俯瞰池岸狀武侯雷府君之象祀焉去今縣四十里
而龍泉太阿之廟別在中路棟宇綿久皆將傾頽邑人
朱憚等洽重熙之化感百世之祀獎率同志唯壽宮千
載光靈煥然如在縣令孟賓于尉孫舉皆以文行之懿

中賢良之選接武連事惠此王畿推誠於民薦信於神
風雨不愆耕鑿咸若先賢遺躅其不泯也宜哉是池廣
不終畝浚才數尺父老云近歲暮旦往往有雲霧蒙覆
其中恍惚之理不可測已今中興三葉聖政惟新豈非
靈命孔昭玄貺將集天命不爽弘之在人使臣司言敢
告有位乃為頌曰

周室既衰仁獸來臻晉祚不融龍劍効珍神化無方天
命無親德之不建與運俱淪歸潛厚載以俟真人惟劍

之神惟賢之識湛湛靈沼綿綿廟食瑞氣長在玄符靡
測垂茲頌聲永永無極

九疊松贊

并序

同安郡南二十里古城南隅有松焉曲拳擁腫若九疊
交柯聳幹無不蟠屈者其地高迴旁無壅閼莫知其何
由如是或曰下有頑石根不得舒氣脉債興故為此狀好
事者以為盛觀焉余始聞其名今至其下睹之而貽曰
嗟夫草木麗地稟天之和條暢秀茂固常也若乃原隰

之宜失陰陽之候違柔脆之姿則離披枯瘁貞勁之質
則鬱抑盤錯生理乖矣獨有瓌奇之貌嗚呼失其所乎
皆在太古君臣強名賢愚同域洪洪洞洞是謂太和降
及後代聖人有作顯仁義建功名扶衰拯弊不得已也
於是有愛惡則象生焉其甚者飾行以矯時執方以違
俗考槃閭巷聲重王公上德喪矣獨有高世之譽嗚呼
荀孟屈賈之徒豈斯松之類邪感物徘徊因為之贊吁
嗟彼松孰為而生天枉其性屈折其形人寔我貴我非

所營噫嘻淳風曷歸大道安行吾欲與汝各全其真作
此好歌以告騷人

硯銘

他山之石是斲是治荆藍表瑩雲露含滋執簡而至磨
鈇在茲言出乎身文以行之噫嗟君子慎爾樞機

野老行歌圖贊

昔在陶唐光宅萬國民無能名帝何有力鼓腹擊壤嬉
遊無極自然而然忘適之適中古道薄親仁懷德末世

政亂姦宄寇賊淳風不還可以嘆息丹青志石存諸佳
則嗟爾有位鑑茲玉式

四皓畫贊

君子道行必資其位邈哉四賢隱居救世皤皤之貌丹
青假志爾無素餐覩此知愧

許真人井銘

長史含道棲神九天人非邑改丹井存焉射茲谷鮒冽
彼寒泉分甘玉液流潤芝田我來自西尋其紫陽若愛

召樹如升魯堂敬刊翠琰永識銀牀噫嗟後學揖此餘
光

高侍郎畫像贊

穆穆清真不緇不磷文高學富道直誠純昭質已邈斯
猷愈新丹青畫像以永光塵崇陰峴首瞻仰霑巾

文獻太子哀冊文

維顯德六年太歲己未九月癸卯朔四日丙午文獻太
子薨於東宮延春殿以某年十有二月壬申朔十三日

甲申遷座於文園禮也象輅輦階龍樓向曙肅仗衛以
將引儼罇壘而不御主上感浚守罷念極賓天痛玉符
之靡召悲銀榜之空懸詔下臣於信史載盛烈於瑤篇
其詞曰

於昭我唐誕受帝祉舊邦惟新令問不已亦有積慶載
生賢嗣平王之孫吾君之子越在綺紈芳若蘭蓀綠車
表慶寶玉疏恩東平錫壤南昌啟藩耆老諮訪丘墳討
論文以行禮時然後言敬愛表於天性信厚由於自然

運屬重熙地惟明兩古尚達節吾先德讓剖符分陝居
東作相封燕禮縉副戎業廣績著保釐道高寅亮敬亭
南屏浙水東馳是惟闕輔以衛京師乃移節鉞建此藩
維擇其令典導以由儀仁薰俗厚化洽風隨國步中艱
文身怙亂鎮以高卧制之長筭取彼鯨鯢戮為京觀吳
門載同輿詞協從天之眷命我豈矜功乃正皇統斯惟
至公爰撫軍而監國亦納揆而登庸業彌盛而學彌廣
望益高而禮益恭不言而信有感則通多壘以之而罷

警四門以之而除克反淳和於國儉致符瑞於年豐天
亦艱諶胡寧不惠大招既謝知生若寄歸虎節於王府
靡驚旌於雉門閉西園之風月慘緱嶺之烟雲象輅迴
兮遵途遠歸帷整兮東流逝枉矢流蒼震之野大耀奄
前星之次捨內豎之間安進浮丘而把袂九重增慟萬
邦銜涕冥茫少海之波寂歷滄雷之肆嗚呼哀哉感神
飈之遠至嘆芳歲之云徂違太學之齒胄啟佳城而下
居建采章於綢練儼備物於塗芻經武帳之剡旒據青

龍之鬱紆嗚呼哀哉苦霧閉塗窮陰殺節重雲之旭日
如晦大壑之層冰似雪指京口而不臨背都門而永訣
萬目愁而旆旌慘羣心感而笳蕭咽嗚呼哀哉瞻玄山
之落木聽瑤圃之迴風臺思子以何極宮長男而遂空
禁荆門之故吏會商嶺之悲翁淚淋浪而洒袂氣怨結
而盈胸嗚呼哀哉歷邃古以遐觀考令猷於三善孰仁
孝之昭著復功名之不顯惟筆史與毗頌配長天而日
遠寧騁麗於東田豈效能於文選嗚呼哀哉

齊王贈太弟哀冊文

維年月日天策上將軍太師尚書令臨川牧齊王薨於
臨川府之正寢主上追先王託付之意表叔父遜讓之
風乃下明詔冊贈太弟即以其年十一月日塋於江州
某縣某鄉廬山之原從理命也絹幕夕陳虞歌曉引改
兔園之賓館設龍樓之陛楯閒靈儀以愈遠窮哀端而
靡盡愴永恨於宸襟俾誕揚於令問詞曰

赫矣元后烝哉古風不私其子天下為公並命仲叔奮

茲顯庸或踐我舊藩或陟爾青宮辭不獲命處之益恭
晉鄭之勲推而更融臧札之操久而彌崇若太伯之讓
異周公之東京江汝水旄節從容皇統既正靈符允荅
國步清謐羣生欣洽復大道於三古永文昭於萬乘越
我嗣君尊尊親親極以呂望之高位崇以貞觀之舊稱
賜書不詔贊禮不名曰予小子寔繫叔父維藩維翰宗
社之故永錫難老日新王度謂天蓋高命亦靡常台階
殞宿河月沉光慟東堂之哀臨輟南國之春相固聖賢

之共歎獨天地以何長嗚呼哀哉身歿壤存道悠運促
贈今日之典冊閱當時之寶玉全大義以經國激清風
而被俗遺昭烈於千齡寄玄堂於陵谷嗚呼哀哉

騎省集卷十四

謹案卷十二第四頁前二行守謙光而冲應原本
脫應字今增

第四頁後五行忽陰閉而陽開原本陰閉訛隆門
今改

第七頁前七行萬里赴機原本脫機字今增

第十一頁前四行而君茅嶺夙心原本夙訛風今
改

第十二頁後二行思其治而愛其樹原本愛訛變

今改


第十四頁前二行舒州新建文宣王廟碑序原本
宣訛昌今改

卷十三第五頁前一行敬亭崇峻鎮其後原本亭
訛畢今改

第六頁後八行卞忠貞之遺隴郭景純之故臺原
本卞忠貞訛忘貞公郭景純訛郭文舉並據晉
書改

卷十四第十頁後一行象輅輦階原本輦訛差據
東京賦改





總校官庶吉士臣張能照

校對官學正臣李巖

謄錄舉人臣李元位